

每週經課朗誦經文(巴克禮漢羅/教羅)2015/10/04

共同經課 - 1

約伯記一章一節、二章一節~十節

1O-su ê 地 bat 有一人名叫約伯, hit 人完全 koh 正直, 敬畏上帝, 離開 chiah-ê pháiⁿ。1 Koh 有一日, 上帝 hiah-ê kiáⁿ 來, 家己 khiā tī 耶和華 ê 面前, 撒旦也來 tī in 中間, 家己 khiā tī 耶和華 ê 面前。2 耶和華對撒旦講, 你 tùi toh 落來? 撒旦應耶和華講, 我 tī 地上行來行去, 遍行 tī-hia, tùi-hia 來。3 耶和華對撒旦講, 你有留心 tī 我 ê 奴僕約伯 mah? 因為地上無人親像伊完全 koh 正直, 敬畏上帝, 離開 chiah-ê pháiⁿ; 你雖然激我攻擊伊, 無因端毀壞伊, 伊猶原執守伊 ê 純全。4 撒旦應耶和華講, 用皮換皮, 人為 tiòh 伊 ê 性命願了伊一切所有 ê。5 總是你伸你 ê 手 kháp-tiòh 伊 ê 骨 kap 伊 ê 肉, 就伊 beh 當面棄絕你。6 耶和華對撒旦講, 看 ah, 伊 tī 你 ê 手頭, 獨獨 tiòh 留伊 ê 性命。7 撒旦就 tùi 耶和華 ê 面前出去, phah 約伯, hō伊 tùi 腳底到頭殼頂生毒瘡。8 伊就用 hāu-phiaⁿ-phè 來 pè 身軀, 坐 tī 火灰中。9 伊 ê bó 就對伊講, 你 iáu-kú 執守你 ê 純全 mah? Tiòh 棄絕上帝來死。10 但是約伯對伊講, 你講話是親像 hiah-ê 慧 ê 婦人人所 teh 講 ê。怎樣 nih? 咱 tùi 上帝受福氣, kiám 無 tùi 伊受災厄 mah? Tī 這一切 ê 事, 約伯並無 tùi 伊 ê 嘴來犯罪。

共同經課 - 2

詩篇二十五篇、二十六篇

1 大衛 ê 詩。1) 耶和華 ah, 我 ê 心神仰望你。2 我 ê 上帝 ah, 我平素 oá 靠你, m-thang hō 我見笑。M-thang hō 我 ê 對敵因為贏我來誇口。3 見若 thèng 候你 ê, 的確無見笑; Hiah-ê 無緣故行奸詐 ê, beh 見笑。4 耶和華 ah, 求你將你 ê 道路指示我, 將你 ê 路途教示我。5 求你 chhoā 我 tī 你 ê 真理, koh 教示我; 因為你是救我 ê 上帝。我 thong 日 thèng 候你。6 耶和華 ah, 求你記念你 ê 憐憫 kap 你 ê 慈愛; 因為這是古早以來常常有 ê。7 求你 m-thang 記念我少年 ê 罪過, kap 我 ê 過失; 耶和華 ah, 求你照你 ê 慈愛, 因為你 ê 恩惠記念我。8 耶和華是好 koh 正直; 所以伊 beh 指示罪人行正路。9 伊 beh 用公平引 chhoā 謙遜 ê 人, 伊 beh 用伊 ê 道路教示謙遜 ê 人。10 見若守伊 ê 約, kap 伊 ê 干證 ê 人, 耶和華款待 in lóng 是用慈愛誠實。11 耶和華 ah, 我 ê 罪真重; 求你因為你 ê 名赦免我。12 甚麼人敬畏耶和華? 耶和華 beh 指示伊所 tiòh 揀 ê 路。13 伊 ê 心神 beh 得 tiòh 安歇; 伊 ê 後裔 beh 承接土地。14 耶和華 kap 敬畏祂 ê 人親密; Koh beh 將祂 ê 約指示 in。15 我 ê 目矚常常 ng 耶和華; 因為伊 beh hō 我 ê 腳脫離羅網。16 求你 oát-tng ng 我, 可憐我; 因為我是孤單 koh 困苦。17 我 ê 心內 ê 憂苦真 choē, 求你救我脫離 tī 我 lóng 總 ê 患難。18 求你看我 ê 艱難 kap 我 ê 勞苦; 赦免我一切 ê 罪。19 求你看我 ê 對敵, 因為 in 真 choē; In 怨恨我真惡毒。20 求你保護我 ê 性命, 拯救我; Hō 我無見笑, 因為我 oá 靠你。21 願純全正直保護我, 因為我 thèng 候你。22 上帝 ah, 求你救贖以色列, 脫離伊一切 ê 艱苦。1 大衛 ê 詩。1) 耶和華 ah, 求你 kā 我判斷; 因為我有照我 ê 純全來行; 我 oá 靠耶和華無搖 choah。2 耶和華 ah, 求你鑑察我, 試驗我; 鍛鍊我 ê 心腸。3 因為你 ê 慈愛常常 tī 我 ê 目矚前; 我亦有照你 ê 真理行。4 我 bē-bat kap hong-hàm ê 人相 kap 坐; 亦無 kap 假做 ê 人做陣。5 我怨恨 pháiⁿ 人 ê 會; 無 beh kap 惡毒 ê 人同坐。6 耶和華 ah, 我 beh 洗手表明我 ê 無罪, Chiah 來 seh 你 ê 祭壇; 7 Thang hō 人聽見感謝 ê 聲, Koh thang 講起你一切奇妙 ê 所做。8 耶和華 ah, 我疼惜你所 toà ê 厝; 以及你榮光所 tī-teh ê 所在。9 M-thang 將我 ê 靈魂 kap 罪人做一下收拾去; M-thang 將我 ê 活命 kap thài 人 ê 做一下收拾去。10 In ê 手中有奸惡; In ê chiáⁿ 手滿滿 pò 賂。11 論到我, 我 beh 照我 ê 純全來行; 求你救贖我, 憐憫我。12 我 ê 腳 khiā tī 平坦 ê 所在, Tī 眾會中, 我 beh o-ló 耶和華。

共同經課 - 3

希伯來書一章一節~四節、二章五節~十二節

1 上帝 tī 在早已經託 hiah-ê 先知, 用 choē-choē 段, choē-choē 方法, kā 列祖講; 2 taⁿ tī hiah-ê 日 ê 路尾, 託伊 ê Kiáⁿ kā 咱講; 就是伊所設立做承接萬物 ê 後嗣, 亦 bat tùi 伊來創造 chiah-ê 世界。3 伊是上帝 ê 榮耀所發出 ê 光, 是上帝本質 ê 真象, 伊用伊權能 ê 話 teh 扶載萬物, 已經成清潔罪 ê 事, 就坐 tī 極高 ê 天頂, 大威嚴 ê 大 pêng; 4 成做比 chiah-ê 天使 khah 大, 合 tī 伊所承接 ê 名, 比 in khah 尊貴。5 因為阮所講 teh 來 ê 世界, 上帝未 bat hō 伊降服 tī 天使。6 獨獨有干證 tī 某所在 ê, 講, 人是甚麼, hō 你 siàu 念伊? 人 ê Kiáⁿ 是甚麼, hō 你看顧伊? 7 你 hō 伊略 á khah 輸天使, Koh 用榮光尊貴, hō 伊做冕旒, Koh 設立伊 tī 你 ê 手所造 ê 頂面; 8 Hō 萬物 lóng 降服 tī 伊 ê 腳下。已經 hō 萬物 lóng 降服伊, 就無 chhun 一項物無降服伊。總是到 taⁿ 咱猶未看見萬物 lóng 降服伊。9 獨獨看見 hit-ê 略 á khah 輸天使 ê 耶穌, 為 tiòh 受死 ê 艱苦得 tiòh 榮光尊貴做冕旒, thang tùi 上帝 ê 恩, 為 tiòh 眾人受死。10 因為萬物所為 tiòh 伊, 萬物所 tùi 伊 ê, teh chhoā choē-choē kiáⁿ 到 tī 榮光, 就 hō 救 in ê 首領 tùi 苦難來成完全, 本是合宜。11 因為 hit-ê hō 人成聖 ê, kap hiah-ê 得 tiòh 成聖 ê, lóng tùi 一個出; 所以伊稱 in 做兄弟無掠做見笑; 12 講, 我 beh 報揚你 ê 名 tī 我 ê 兄弟, O-ló 你 tī 會中。

共同經課 - 4

馬可福音十章二節~十六節

2 有法利賽人就近伊, 問講, 人離出伊 ê bó, thang mah? 是 teh 試伊。3 耶穌應講, 摩西命令 lín 怎樣? 4 In 講, 摩西准人寫離書, 來離伊。5 但是耶穌 kā in 講, 摩西因為 lín ê 心硬, chiah 寫 chit-ê 命令 hō lín; 6 總是 tùi 造化 ê 起頭, 主創造 in 有男有女。7 因為 án-ni 人 beh 離開父母, 結聯伊 ê bó, 兩個 beh 成做一體; 8 親像 án-ni, 無做兩個, 是做一體。9 所以上帝所配合 ê, 人 m-thang 分開伊。10 入厝學生 koh 將 chit-ê tī-chi 問伊。11 伊 kā in 講, 凡若離出伊 ê bó 來娶別 ê, 是行姦淫來辜負伊; 12 bó 若棄 sak 伊 ê 丈夫來嫁別 ê, 也是行姦淫。13 有人帶細 kiáⁿ 就近耶穌 beh hō 伊摸 in; 學生責備 in。14 耶穌看見 án-ni, 大無歡喜, kā 學生講, 容允細 kiáⁿ 就近我, 莫得禁 in; 因為上帝 ê 國是 chit 號人 ê。15 我實在 kā lín 講, 凡若承接上帝 ê 國無親像細 kiáⁿ ê, 決斷 boē 得人去。16 就抱 in, kā in hoāⁿ 手, 祝福 in。